



Moglegheiter for alle på Osterøy

Høgre vil at Osterøy skal vere ein god kommune å leve i og ein attraktiv kommune å busetje seg, arbeide og driva bedrifter i.

Me meiner at det er du sjølv som veit best kva som er rett for deg. Derfor vil Høgre kjempe for retten din til å velja sjølv, og din rett til å vere annleis. Fridom er òg ansvar. Fridom til å velje sjølv vil seie at ein også må ta ansvar for konsekvensane, men samstundes skal alle kjenna på grunnleggjande velferd og tryggleik.

Samfunnsutvikling

Som alle andre organisasjonar må Osterøy kommune støtt strekkja seg etter å verta betre for å levere eit veksande omfang av tenester i tråd med statlege krav og innbyggjarane sine behov og forventningar. For å klara dette må kommunen arbeida vidare med å bli meir effektiv og jobba smartare, for å yta meir med færre ressursar, og samtidig ta vare på dei tilsette si helse, trivsel og faglege utvikling.

Økonomi

Me vil føra økonomisk ansvarleg politikk som ikkje set kommunen sin handlefridom i fare, men tvert imot, byrjar å gje moglegheiter for å utvikla samfunnet vidare med kommunale midlar.

Derfor vil Osterøy Høgre:

- Arbeida vidare for ein balansert kommuneøkonomi som leverer overskott;
- Verta betre på å få tak i tilskottsmidlar og refusjonar for å styrkja økonomien.

Osterøy Høgre vil prioritere kommunale investeringar slik i perioden:

1. Utbygging av Omsorg Pluss ved Osterøytunet;
2. Utviding av Osterøyhallen og bygging av symjehall i tilknyting til den;
3. Ny ungdomsskule på Hatland.

Lokal styring

Me ønskjer at kommunen skal medverke til å la det frivillige og private initiativ vekse og skape eit levande samarbeid mellom den frivillige sektor, privat næringsliv og kommunen.

Derfor vil Osterøy Høgre:

- At med bygging av gode fagmiljø sikra at Osterøy Kommune er ein attraktiv arbeidsgjevar, men at ein kjøper fagtenester frå nabokommunar der dette er meir tenleg;
- Arbeida for auka kommunalt sjølvstyre overfor statlege og regionale styresmakter;
- Setja av 5% av innkrevd eigedomsskatt kvart år til Osterøy Utvikling for å skapa fleire arbeidsplassar i kommunen.

Kommunesamanslåing

Me utelukkar ikkje framtidig samanslåing med Bergen om Osterøy kommune si økonomiske stode ikkje betrar seg. I så fall ønskjer me å inngå dialog med Bergen om vilkår og føresetnader for ei mogleg samanslåing, og deretter halde ei folkerøysting om godt framstilte alternativ.

Næringsliv og verdiskaping

Eit lønsamt og nyskapande næringsliv er ein føresetnad for samfunnet si offentlege og private velferd.

Utvikling

Kommunen lyt leggja til rette for fleire samarbeidsprosjekt og nyetableringar, og vidare vekst av eksisterande verksemder for å skapa fleire arbeidsplassar på både kort og lang sikt.

Derfor vil Osterøy Høgre:

- At kommuneadministrasjonen og næringslivet har same ambisiøse mål og spelar på same lag. Kommunen er ein viktig kunde for næringslivet og næringslivet er viktig for kommunen;
- At næringslivet vert møtt med ein positiv, open, hjelpsam og velviljig haldning frå kommunen, og at alt vert gjort for at sakshandssamingstida og kostnadane kan reduserast vesentleg;
- Få fjerna større rekkjefylgjekrav til mindre private utbyggingsplanar som kommunalt verkemedel til utbygging av offentleg infrastruktur. I større planar få kommunen til å samarbeide med utbyggjar til å inngå spleiselag også saman med andre offentlege mynde.

Reiseliv

Reiselivet skal vere eit satsingsområde og Osterøy har gode moglegheiter for å visa seg fram som eit attraktivt reisemål.

Derfor vil Osterøy Høgre:

- Styrkja samarbeidet mellom næringslivet og kommunen for å fremje Osterøy som turistmål;
- Styrkja samarbeidet mellom kommunen og grenadaråda for å leggja til rette for skilting og parkering nær reisemål.

Miljø og natur

Me vil arbeide for ei berekraftig utvikling der økonomisk vekst ikkje går utover natur og miljø. Me vil auka bruken av alternative energikjelder og bruke dei tradisjonelle energikjeldene meir effektivt, med særskild prioritering av offentlege bygg og eigedom på dette området.

Klimatiltak og berekraft

Me ynskjer å setje fokus på prosjekt som vil bidra til både redusert og meir effektiv energibruk.

Derfor vil Osterøy Høgre:

- Fokusere på energisparande tiltak ved nybygg og rehabiliteringar i kommunal regi;
- Gjennomgå energibruk i offentlege bygg med mål om å gjennomföra energisparande tiltak som gjev miljøsertifikat med bruk av alternative energikjelder som solceller, grunnvarme, solfangarar og så bortetter;
- Halde fram å skifta ut kommunen sine kjøretøy med el-bil.

Natur og berekraftig utvikling

Osterøy er ei perle av ei øy i Nordhordland, med unike natur- og friluftsopplevelingar. Me har eit viktig ansvar for å sørge for at komande generasjonar får nytte desse verdiane som det me gjer i dag.

Derfor vil Osterøy Høgre:

- Föra ein forsvarleg forvaltningspolitikk gjennom vern av unike naturområde, og sikring av allmenn tilgang til strandsona;
- Prioritera konsentrert utbygging i sentrumsområda;

- Verna om og styrkja det landbruket og naturen me har så langt som råd er;
- Arbeida for arealnøytralitet som prinsipp ut frå jordvernomsyn;
- Samarbeide med grendaråd og andre frivillige organisasjonar om rydding av søppel i naturen og langs kysten.

Omsorg og helsetenester

Me meiner at kommunen sine innbyggjarar skal vera sikra eit tenleg helsetilbod når dei treng det, med målgrupper som spenn frå svangerskap til eldreomsorg. Helse- og omsorgstenester krev m.a. mykje mannskap og er derfor dyre. Heradsstyret vedtok våren 2018 utbygging av bustader med heildøgns omsorg (Omsorg Pluss) som den gongen hadde potensiale for å spara 17 millionar i sektoren sine årlege driftsutgifter.

Derfor vil Osterøy Høgre:

- Få i gong utbygginga av Omsorg Pluss så snart som råd er;
- At kommunen undersøkjer innføring av «Nordsjøturnus» i helse- og omsorgssektoren saman med høvelege strukturendringar, som andre kommunar har sett gje tilsette ein betre kvardag og lågare sjukefråvær;
- Prioritere i høgre grad førebyggjande arbeid for å redusere sjukdom og slitasje.

Tilrettelagt arbeid

Eit samfunn i endring og med stadig større krav til utdanning, fagkunnskap og språk gjer at mange fell utafor arbeidslivet utan å få høve til å visa kor store ressursar dei eigentleg er. Fleire unge trives

ikkje på skulen eller er lei. Både innvandrarar og flyktingar manglar språkkunnskapen eller arenaer for å øva norsk. Dette kunne gjeve dei moglegheita til arbeid i det faget dei lærte i heimlandet. Me meiner at alle som ønskjer å jobba skal få høve til det og her er **Opro** eitt av våre viktigaste verkty.

Derfor vil Osterøy Høgre:

- Endra Opro sitt føremål til å ikkje vere ein mellomstasjon der alle arbeidstakrar på sikt skal ut på den private marknaden;
- Utvida Opro sitt mandat til å kunne tilby arbeid for fleire grupper enn varig tilrettelagte plassar;
- At Opro skal kunne tilby personar arena for språktrening;
- At Opro også skal kunne tilby arbeidstrening til personar som enno ikkje mottek statlege ytingar frå NAV;
- At Opro vert eit selskap der ein kan stolt jobba så lengje ein vil, og der arbeidet er tilpassa til den enkelte.

Oppvekst

Nøkkelen til velstand og moglegheiter i framtida ligg i investeringa samfunnet gjer i oppveksttilhøve og opplæring av born og unge.

Barnehage

Det er viktig at barnehagane i kommunen gjev eit trygt tilbod med god pedagogisk kvalitet.

Derfor vil Osterøy Høgre:

- Prioritere at Osterøy kommune til kvar tid har full barnehagedekning med noko overkapasitet som også tek høgde for tilflytting og geografisk varierande behov;
- At kommunen skal syta for tilstrekkeleg bemanning i barnehagane og moglegheiter for vidareutdanning av tilsette;
- Vere positiv til søknader om utbygging av nye private barnehagar som skårar kommunen for slike investeringar.

Skule

Me vil at skulen skal ha høg kvalitet og gode tilhøve for barn sin læring og sosial utvikling, uavhengig av deira faglege styrke eller kva skule dei går på, der dei har moglegheita for å lukkast.

Derfor vil Osterøy Høgre:

- Inga endring på den skulestrukturen kommunen alt har;
- Byggja ny ungdomsskule for dei neste 50 åra;
- At det vert satsa meir på styrking av lesing i barneskulen mellom anna med å sikra eit bokbuss-tilbod;
- Arbeida vidare for å sikra trygg tilkomst til skulane, mellom anna med fleire gang- og sykkelvegar;
- At kommunen held fram å senda signal til KS om at ein ønskjer å prioritere lærarane som yrkesgruppe i lønnsforhandlingar.

Kultur, idrett og frivillig arbeid

Osterøy er kjent for lange og sterke tradisjonar innanfor kultur og idrettsliv. Deltaking i frivillige organisasjoner med ulik form og føremål skapar samhald, tilhørsle og lokal identitet.

Derfor vil Osterøy Høgre:

- Utvida Osterøyhallen med ein tredel og samtidig installere alternative energi- og oppvarmingskjelder;
- Byggja ny symjehall attmed Osterøyhallen som erstatning for den gamle i kjellaren på Ungdomsskulen;
- Sjå til at leigekostnadene av kommunale bygg vert til marginal kostpris for samfunnsnyttig arbeid, og gratis for barn og unge.

Samferdsle og kommunikasjon

Eit godt fungerande samfunn treng gode, trygge og godt vedlikehaldne vegar.

Transportlinjer

Som øykommune må Osterøy ta vare på alle eksisterande transportlinjer mot fastlandet, men også vurdere alternative samband. Medan Osterøyvegen frå brua til Lonevåg er den udiskutable hovudfartsåra, er ferjesambandet Valestrand–Breistein eit viktig alternativ til den.

Derfor vil Osterøy Høgre:

- Arbeida med å få prioritert og finansiert ferdig planlagde gang- og sykkelvegar langs fylkesvegane og skulevegar;

- Arbeida vidare med å få Vestland fylkeskommune til å overta Valestrand-Breistein som offentleg ferjesamband;
- Arbeida vidare opp mot fylkeskommunen for å få utbetra m.a. vegane til Fotlandsvåg, Tysse og Bruvik kor det må bli trygt å kjøra med både bil, buss og lastebil;
- Styrkja vedlikehald av eigne kommunale vegar.

Kollektivtrafikk

Ein stor del av kommunen sine innbyggjarar pendlar ut av kommunen til jobb eller skule. Arna som fylkeskommunalt områdesenter og dobbeltspor gjennom Ulriken i nær framtid vil vidare endra eksisterande pendlarmønster. Av omsyn til miljø og framkomst på vegnettet må ein større del av persontransporten skje i form av kollektivtransport.

Derfor vil Osterøy Høgre:

- Arbeida for å få fleire direkte bussruter mellom Lonevåg og Arna, og mellom Valestrand og Arna;
- Arbeida for at bussane om ferja til Bergen sentrum vert ekspressbussar med langt færre stopp på fastlandet;
- Arbeida for ein allmenn auke i frekvens på bussavgangane;
- Arbeida for betre koordinering mellom ferje-, buss- og togrutene;
- Arbeida for betre løysingar for pendlarparkering nær haldeplassar slik at fleire kan velja kollektivtransport på delar av strekninga;
- Undersøkje moglegheita for å nytta ny teknologi som kan gi betre og meir effektive kollektivtenester.